

Bina reban ayam di kawasan larangan



Reban haram yang dibina di tepi Pantai Geliga, Kemaman menempatkan lebih 200 ekor ayam kampung.

Penduduk desak penceroboh diambil tindakan kerana bina reban di kawasan diwartakan pendaratan penyu

RAIHAM MOHD SANUSI

KEMAMAN

Penduduk meminta pihak berkuasa mengambil tindakan tegas terhadap individu tidak bertanggungjawab yang menceroboh Pantai Geliga, di sini yang diwartakan kawasan pendaratan penyu dengan membina reban ayam kerana perbuatan itu mengganggu penyu yang naik bertelur.

Wakil penduduk yang mahu dikenali sebagai Zakaria Yusof, 64, berkata, tindakan penceroboh itu

memberi ancaman kepada penyu yang kini semakin pupus di mana lokasi reban itu terletak hanya kira-kira 100 meter dari Pusat Penetasan Penyu Geliga.

Menurutnya, penduduk menyederai pencerobohan itu berlaku di kawasan pantai yang mencatatkan pendaratan penyu tertinggi di Malaysia itu sejak setahun lalu.

Katanya, kawasan itu bukan sahaja didirikan reban ayam yang menempatkan lebih 200 ekor ayam kampung, malahan individu itu turut membina jalan berbatu kelikil sejauh lebih 100 meter bermula tidak jauh dari jalan utama hingga ke kawasan pasir di tepi pantai.

"Jarak reban ayam itu sangat dekat dengan pantai iaitu sekitar 55 meter sahaja. Bila ada reban ayam di situ, kawasan itu juga diterangi lampu.

"Cahaya lampu itu mengganggu penyu untuk naik bertelur sebab penyu tidak akan bertelur kalau kawasan pantai diterangi cahaya," katanya.

Zakaria berkata, selain reban ayam, terdapat dua binaan baharu turut dibina di kawasan itu seperti kandang dipercayai untuk menempatkan lembu di mana ketika ini lembu-lembu dilihat dilepaskan di kawasan sekitar reban terbabit.

Jelasnya, selain menternak ayam tanpa kebenaran, individu yang menceroboh juga turut meletakkan tiga buah bot di tepi pantai itu yang turut menyukarkan penyu menggali pasir untuk bertelur.

"Individu itu juga turut memancing di kawasan ini pada waktu ma-



Longgokan sampah sarap mencemari kawasan pantai yang diceroboh.

lam dan menyalakan unggun api. Penceroboh turut membawa kenderaan pacuan empat roda sehingga ke kawasan berpasir di tepi pantai hingga beberapa hari lalu, ada seekor penyu naik bertelur bersebelahan kenderaan tersebut.


"Ekoran pencerobohan haram ini, kawasan berkenaan juga dicemari dengan longgokan sampah sarap. Sampah menuhi kawasan itu yang sakitan mata memandang dan sememangnya boleh berikan buruk kepada penyu yang naik untuk bertelur," katanya.

Berikutan itu, Zakaria merayu pihak berkuasa mengambil tindakan tegas terhadap penceroboh untuk memastikan kawasan pendaratan penyu di negeri ini dapat dilindungi sepenuhnya lebih-lebih lagi kawasan tersebut



Notis amaran dikeluarkan Pentadbir Tanah Kemaman ditampal pada reban.

mencatatkan pendaratan penyu paling tinggi di negara ini berbanding di tempat lain.



Tindakan penceroboh meletakkan kenderaan di tepi pantai pada waktu malam mengganggu seekor penyu yang naik bertelur.